



TAPAK 10

Romero aser Rojo nati Man United
toktsütsü akok: Solskjaer

TAPAK 8

Tir asütsü Trump
metemsü: Biden

VOL. XVIII NO. 86 (ADOK 86) DIMAPUR

AMUNGNÜ (SUNDAY) AENJETI (JANUARY) 10, 2021

₹ 5.00

Dzukou nung mi tasen adoka mali



Kohima, January 9 (TYO): Tanü agi anogo asemubaba mi mesüra mokozü adokba menguaka Dzukou valley base camp nung amongertemi iba temeket kanga junga tenük yoka repringdar ta ketdangsertemi ashi.

Dzukou tziukong nung morok mi adokba sülen tanü agi anogo 12 buba süia aruogo.

"Tetsüng agi tonga moutetba tesem ka nung mokozü tera alongba dak alaka tanü mi tasen adokba kecha mangu. Tanü anüngdang IAF helicopter ajanga mokozü adokba tesem nung Bambi bucket operation ajanga miji ensepogo" ta Kohima Divisional Forest Officer (DFO) Kohima Rajkumar M-i ashi.

Hokolbarnü iba kasa tesem nung mokozü adokba angu aser ali nungi mapa inyakertemi iba tesem tonga aotsü merandang saka makok. Iba tesem nung tetsüng lenmang kecha mali, ta paisa ashi.

"Honibar nikongdang 4:30 ako tashi nung Nagaland State Disaster Management Authority,

National Disaster Response Force aser IAF-i anüng nungi repringa senzüdang mi tasen adokba mesüra mokozü alongba kecha mangu" ta Rajkumar-isa metetdaksü.

NDRF, SDRF, Police & Forest personnel den Southern Angami Youth Organisation volunteer 200 shi base camp nung mongzüka lir aser parnoki tensa kanga junga repringdar, ta DFO Kohima-isa ashi.

Deobarnü ali nungi mapa inyaksü aser nüngdakra helicopter amshitsü. Asüng 11:00 ako meta joint aerial survey agiba sülen telemetba ka agitsü, ta paisa shisem.

Tanü DFO Dimapur, Beizo Suokhrie IFS aser Sr. Consultant NSDMA, Hinotoli nungertemi IAF helicopter nungi tesem repringdanga senzü.

Külen, ali nungi mapa inyakertemi SDO Kohima, Daniel Angami den DDMO Thejangulie Zao aser SDPO South nung lenisüba kübok NDRF, Kohima Police, Forest aser Volunteers liasü.

Pagala pahar tesem shibangba nenshir

Dimapur, January 9 (TYO): Gauhati High Court, Kohima Bench-i Pagala pahar tesem nung traffic noktangtsü aser four lane maparen sadema inyaksü atema tetuyuba agütsüba ama, Chathe River Bridge (Patkai Bridge) nungi Kukidolong tashi tsünglanglen agüja aliba mapang senzusenbongba noktangtsü, ta Dimapur DC Rajesh Soundararajan, IAS-i tanü nenshia metetdaksüogo.

1. December 19, 2020 anepdang 7:00 ako nungi December 21, 2020 anepdang 5:00 ako tashi.
2. January 9, 2021 anepdang 7:00 ako nungi January 11, 2021 anepdang 5:00 ako tashi.
3. January 16, 2021 anepdang 7:00 ako nungi January 18, 2021 anepdang 5:00 ako

4. tashi.
5. January 23, 2021 anepdang 7:00 ako nungi January 25, 2021 anepdang 5:00 ako tashi.
6. January 30, 2021 anepdang 7:00 ako nungi February 1, 2021 anepdang 5:00 ako tashi.
7. February 6, 2021 anepdang 7:00 ako nungi February 8, 2021 anepdang 5:00 ako tashi.
8. February 13, 2021 anepdang 7:00 ako nungi February 15, 2021 anepdang 5:00 ako tashi.
9. Iba mapang Dimapur - Kohima tsüngda senzüba gari tilatemi 7th Mile - New D.C office - Shokhuvi - Razaphe - Mhaikam - Pimla - Mhainamtsi -Jhornapani/Medziphema ajanga senzütsü akok, ta Dimapur DC-isa metetdaksü.

COVID-19 Nagaland: Nisung 112 dang anepaludar

Kohima, January 9 (TYO): Honibarnü Nagaland nung COVID-19 aliba puteter dang nungibo taneptsü angur timba liasü.

Tanü tashi nung Nagaland nung nisung 11,975 dak COVID-19 aliba putetba nungi parnok 112 dang anepaludar.

"Tanü nisung 11 dak COVID-19 aliba putet. Parnokji Dimapur nung 7 aser Kohima o Mokokchung nung anana (2). Külen, nisung 25 tashi taneptsü angu. Parnokji Kohima nungi 14, Dimapur nungi 7 aser Mokokchung nungi 4 lir" ta Health & Family Welfare Minister, S Pangnyu Phom-i ashi.

Nisung 11,975 nungi parnok 11,639 tashi taneptsü nguogo, ta paisa ashi.

"Tanü taneptsü angurtem züngsema Nagaland nung COVID-19 nungi taneptsü angubaji 97.19%

lir" ta Minister Pangnyu-isa shisem.

"Nagaland nung COVID-19 aliba puteter nisung 85 tashi asü. Parnok rongnung coronavirus ajanga nisung 74, tanga tashidak ajanga nisung 10 asü aser ka asüba kuli bushitepdar" ta Health & Family Welfare Department Director, Dr Denis Hangsing-i ashi.

Nisung 139 tashi tanga state temi ogo, ta paisa shisem.

District balala nung COVID-19 putetba: Dimapur (6,434), Kohima (3,720), Mon (604), Peren (504), Tuensang (244), Mokokchung (181), Zunheboto (142), Phek (47), Kiphire (41), Wokha (39) aser Longleng (19).

Nisung 11,975 rongnung Traced Contacts 4,905, armed forces personnel 4,658, tanga state tem nungi arur 1,844 aser Frontline Workers 568 lir, ta Dr Hangsing-isa ashi.

Jan 16 nungi India nung Covid vaccine agütsütsü

New Delhi, January 9 (Agencies): January 16, 2021 nungi India nung coronavirus vaccine agütsüba maparen tenzütsü ta Honibar nikongdang Centre-i osang metetdaksüogo.

Prime Minister Narendra Modi-i tanü tongti ketdangsertem den linük nung Covid tensa meyipa repringshiba aser vaccine agütsüba osang metetpelaba senden ka amenba sülen iba osang metetdaksüogo.

Iba senden nung Cabinet Secretary, Principal Secretary to PM, Health Secretary aser tanga tongtipang ketdangsertem aden.

"COVID-19 anema raraba nung iba ya otsütsütsü mapa ka lir" ta Prime Minister Modi-i ashi.

"Covid-19 anema vaccine ji mezüng healthcare workers crore ka shi aser doctors, community health workers & police dena frontline staff crore 2 nem

agütsütsü. Parnoki len anir iba wara anema rarar. Iba telok nung vaccine angati agütsütsü" ta Union Health Minister Dr Harsh Vardhan-i taoba hopta metetdaksüogo.

Vaccine agütsütsü atema tanabuba telokji arishi küm 50 temapurtem asütsü aser parnok sülen arishi küm 50 teküpok saka tashidak aketer nem agütsütsü. Mezüngbuba shilem nung nisung crore 30 shi nem vaccine agütsütsü atema alizüng yua lir.

Tanü vaccine agütsütsü osang sangoktsüba sülen minute ishika dang lir Prime Minister Modi-i "January 16 nü India-i COVID-19 anema raraba nung tongtipang mapa ka tenzütsü" ta ashi.

"Iba anogo nungi India linük ajunga nung vaccine agütsüba mapa tenzütsü. Tamasa doctors, healthcare workers, safai karamcharis dena frontline

District balala nung tang anepalurtem: Dimapur (64), Kohima (31), Mokokchung (9), Peren (5), Mon (1), Longleng (1) aser Kiphire (1).

"Tang anepalurtem rongnung nisung 17 dak shirangba yimya terara lir, ka kanga shiranga oxygen agidar aser 4 ventilators nung lir. Nisung 90 dakbo shirangba yimya kecha mali" ta paisa ashi.

Taneptsü angurtem: Dimapur (6,240), Kohima (3,633), Mon (592), Peren (499), Tuensang (243), Zunheboto (139), Mokokchung (163), Phek (47), Kiphire (39), Wokha (35) aser Longleng (9).

Nagaland nung COVID-19 alitsü akok ta temolung melemi bilemba sample 1,21,763 tendangogo. RT-PCR ajanga sample 72,672, TrueNat ajanga sample 36,823 aser Rapid Antigen Test ajanga sample 12,268 tendang" ta Dr Hangsing-isa metetdaksü.

workers nem temolung agütsütsü" ta Modi-isa metetdaksü.

Mongulbarnü Centre-i vaccine agütsüba maparen nung CoWIN app (Covid Vaccine Intelligence Network) aser ecosystem amshitsü ta shiogo.

CoWIN digital platform ajanga vaccine stocks aser storage temperatures indang osang tejangja agütsütsü. Iba platform nung nisung lakh 79 shi tenüng zülüokogo, ta Centre-isa ashi.

Iba app ya ano mesaya lir saka iba nung Aadhaar number amshitsü aser oshi 12 shi alitsü.

Arishi küm 50 teküpok alirtemi iba app nung medical certificates upload sür vaccine agitsü akok.

India nung Serum Institute ajanga yangluba Oxford COVID-19 vaccine Covishield aser Bharat Biotech ajanga yangluba Covaxin vaccine ana amshitsü temelaba agütsüogo.

Tesüiba küm 6 tashi NE tensa tajung liasü: Centre

New Delhi, January 9 (Agencies): 2014 nungi northeast state tem nung security tensa tajungba kümogo ta Union home ministry-i ashi.

"Tesüiba küm trok tsüngda telungpur dak sendakba tatalokbatem kanga ajema liasü. 2020 tashi telungpur dak sendakba maparen kangabo mataloki aruogo" ta Union home ministry-i metetdaksü.

"Tesüiba küm 6 tsüngda security tensa tajungba akümba agi Meghalaya aser Tripura nung Armed Forces Special Powers Act ajunga agienogo aser Arunachal Pradesh nunga tera agienogo" ta parnokisa ashi.

Union home ministry-isa Bru-Reang Refugee tebilemtsü atema tenangzüktep sign asüba indang shia lir.

"Iba otsütsütsü tenangzükb

ya Prime Minister Narendra Modi-i North East renlok daksütsü aser nübortem tashi itdaksütsü atema alizüng ayuba kübok inyakba liasü" ta parnokisa metetdaksü.

Northeast nung yimjung atema inyakba maparen nung yaküm January ita Assam nung ULFA (I), NDFB, KLO teloktem nungi züngsema telungpur 644 tashi temai adok, ta MHA-isa ashi.

Avian Influenza atema Assam-i an bener aruba noktanger

Guwahati, January 9 (Agencies): Linük kübok tesem kar nung an wara adokba osang angazükba sülen Assam sorkari anüolen aliba state tem nungi an bener aruba noktango.

Avian Influenza ya an tsüngda

kanga kara menatepba tashidak ka lir ta Honibarnü Assam sorkari sangdong ka nung ashi.

Iba jagi anüolen state tem nungi an bener aruba khi atema noktanga atar, ta sorkarisa metetdaksü.

Iba tebilemtsü atema Veterinary department-i Forest department ketdangsertem dang state nung tenük yoktsü atema jembitepogo.

Assam-i hopta shia tanga state tem nungi an techanun lakh 20 (one-day-old) shi bener arur.

F&ES aser SAYO züngsemtemi Dzukou Valley semdang



Fire & Emergency Services ketdangsürtem den SAYO volunteers tem Dzukou Valley nung tangokba noksa nung angur.

Dimapur, Aenjeti/January 9 (TYO): Fire & Emergency Services led by IG (F&ES) Department den Fire & Emergency personnel 11, SAYO (Southern Angami Youth Organisation) volunteers ana aser

tanga volunteer anati January 7 nü Dzukou Valley semdanga morok mi ajanga Dzukou Valley raksatsüba aser temeket nung tesemtem asadangogo.

Department-i, tarutsü nung morok mi adoktsü nungi jenboa

alitsü atema Preventive & Control dak sendakba nung sorkar nem osang agütsütsü.

Kasa mapang nung Department-i SAYO dang parnok teyari asoshi kanga pelaba lemsatep.

Deputy CM Chowna-i private power developer tem jaoktsü shidang



Arunachal Pradesh Deputy Chief Minister Chowna Mein

Itanagar, Aenjeti/January 9 (Agencies): Arunachal Pradesh Deputy Chief Minister Chowna Mein-i Honibarnü, state nung hydropower tashi amshitsü asoshi maongka aliba agitsü atema private power developers tem jaoktsü shidang, ajita asünung state rongsenketsü nung terenlok bener arutsü.

Itanagar nung hydro projects ana yanglutsü aliba dak sendakba nung senden ka amenba mapang Arunachal

Pradesh Deputy Chief Minister Chowna Mein-i, state-i private power developers tem jaokba ajanga mapa mongui aliba laurtem atem mapa inyaksü maongka agütsütsü, ta ashi.

"Hydropower project tem ya khen yangluadokra power dak sendakba nung state tangar dak metaloker malitsü, kechiyong iba mapa inyaktermi state sorkar nem angati shilem 5 nungi 10 tashi agütsütsü aser iba den local area development atema shilem ka agütsütsü. Iba ajanga local entrepreneurs tem atema industry and food processing units amenoktsü asoshi lenmang sadema lapoktsütsü," ta Mein-i ashi, shibai Power portfolio bena lir.

Iba senden nung iba maparen dak sendaka alir ajak jaoka, Lower Subansiri district kübok Pistana circle nung 23 MW Keyi hydro-electric project ka aser Papum Pare district kübok Sagalee sub-division nung 14.5 MW Pareng project ka amenoktsü aliba indang sensaksemogo.

Project ana inyakba ajanga kongshiba nüburtem timtem sorkari reprangshimtsütsü nangzüka Mein-i, state nung lenmang sadema lapoka liaka power agi kanga anünger ta ashi.

Paisa, State indang Hydro-power Development Policy ya linük nung tajungtiba rongnung ka lir, kechiyong tanga state nung inyakyim tajungtem ajak reprangzüka inyaker, ta ashi.

Deputy Chief Minister-isa, private power developer tem dang maparen ajak odangtetsüsa inyaksü aser mapa anep anepa inyakyonga aotsü atema nüburtemi parnok dak tamang akaba mesamadaktsütsü ajungshi.

Senden nung iba mapa ajanga kongshiba nüburtem tebilemtsü achaayangtsü atema committee ana tentettsü. Keyi project atema Education Minister Taba Tedir lenisüba kübok committee ka tentettsü aser Pareng project atema taoba Chief Minister Nabam Tuki lenisüba kübok committee tentettsü.

Aluyimba ajungkettsü atema CPIM sorkari kecha minyak: Roy

Dharmanagar, Aenjeti/January 9 (Agencies): Tripura agriculture minister Pranajit Singha Roy-i honibarnü ashiba agi, taoba CPIM sorkari state nung agriculture sector ajungkettsü atema mapa aikabo minyak.

Roy-i, North Tripura district kübok Kadamtala aser Kalachhara agriculture subdivisions nung Ichai Lalchhara Krishi Bazar nung tawa yangluba 1,000 metric tonnes seedbed ka semzüksüba mapang iba olen lemsatepa liasü.

Minister-isa, Ichai Lalchhara Krishi Bazar nung tawa yangluba Krishak Bandhu Kendra aser Krishi Regional

Office lapoktsü.

Pranajit Singha Roy-i, "taoba CPIM sorkari agriculture sector ajungkettsü atema kecha minyak. Parnoki yimsü asüba mapang state nung chiyongtsü rizünga ayutsü atema cold storage amala facility kecha yanglua metoktsü," ta ashi.

Metsüjangnatsü metric ton 1000 yutettsüsa seedbed tasen ka yanglutsüba ajanga aluyimertem nem tajangzük tulu agütsütsü.

Seedbed facility ajanga aluyimertemi jenjang aketba metsü aser saplings tem agizüka amshitetsü.

"Sorkari aluyimertem atema teti bilemer aser parnok

rongsenketsü nung ajungkettsütsü asoshi meranga inyakdar," ta agriculture minister-i ashi.

Kasa mapang nung Kadamtala block aser Kalachhara blocks nung aliba aluyimertem ajaki iba facility ajanga agütsüba maongka balala amshitetsü.

Tripura assembly deputy speaker Biswabandhu Sen, North Tripura district council president Bhabatosh Das, state agriculture department director Debaprasad Sarkar, North Tripura district council züngsemtem aser agriculture standing committee mendenbuba iba sentong nung densema liasü.

Mapa nungi anentsür aliba tesayur ka soseta asü

Agartala, Aenjeti/January 9 (Agencies): Khowai district nung alir tesayur ka January 9 nü soseta süogo.

Tesayur ya Rini Debbarma ta jangjaogo, shiba Tripura University nungi gold medalist ka aser Ampura Higher Secondary school nung tesayur mapa inyaka liasü.

Left front sorkari 2010 nungi 2014 küm tashi nung tesayur 10,323 mapa nung aniok, ajisüaka tesayur shimba inyakyim nung aibelen aliba ajanga Suprem Court-i 2016 küm obendang agütsü aser item tesayurtem ya 2020 küm March ita 31 nü nungi mapa nungi agin.

Mapa nungi aginer aliba

tesayurtemi Joint Movement Committee' ta nungja agütsür telok ka tentet aser parnok mapa nung tanaben aniokshitsü atema khanga arudar, ajisüaka tanü tashi nung sentong kecha mataloki lir.

Osangbenertem den sensaksemba mapang Joint Movement Committee lenir Dalia Das-i, Rini Debbarma-i lar küm ka jabaso den külemi miim chir asü, ta metetdaksü.

Osang ajanga ashiba agi, tetsü aser tanur na Khowai district hospital-i anir ao, saka Debbarma len tom nung süadok.

"Tanobusang ya ICU nung temang kanga mejungi lir," ta kasa osang ajanga metetdaksü.

Manipur nung Covid-19 tashidak aneper timba kümdar



Imphal, Aenjeti/January 9 (Agencies): Taoba ghonda 24 tsüngda Manipur nung Covid-19 tashidak mena alir nisung 48 putetogo.

Ajisüaka state nung iba tashidak ajanga nisung asüba osang kecha mali.

Manipur health department-i ashiba agi, state nung tang tashi nung coronavirus tashidak agi shiranga alir nisung 27,735 anepba sülen recovery rate 97.04 per cent jungogo.

Tang state nung tashidak

menar 28,579 jungogo.

Manipur nung tashidak agi tonger temang anepalua alirtem parnok 480 lir aser iba tashidak ajanga state nung nisung 364 süogo.

State health department-i January 8 nü Thoubal aser Imphal West district dak alaka state ajunga nung Covid-19 vaccines atema dry-run sentong ka ayongzüka agiogo.

Centre sorkari India nung January 16 nü nungi tenzüka nüburtem nem vaccine agütsü tenzüksü.

Morok mi temseptsü atema Spear Corps security Forces team yokogo



Kohima, Aenjeti/January 9 (TYO): Dzukou Valley nung

morok mi temseptsü atema NDRF den Spear Corps security Forces team tem yokogo, koba December 29 nü nungi maziükteti ronga arudar.

Aotoktip len Dzukou ayong temeket nung mibenertemi kanga takok ngua mi temsepar aser miorok tali prokshia aotsü nungi nokdangtsü atema meyi ia

toktsüogo.

Dzukou Valley nung Spear Corps team temi NDRF team tem nem logistics support agütsüdar. Security Forces-i nüngdakba mapang shidak nung teyari tulu agütsüba atema civil administration aser NDRF team-i parnok dang kanga pelaba lemsatepogo, ta PRO (Def) Lt Col Sumit K Sharma-i sangdong ka ajanga metetdaksü.

Tripura CM Deb tenüing menüksür ka apu



Tripura chief minister Biplab Kumar Deb aser pa kinungtsü Niti Deb tenüing menüksüba atema police-i Alkas Uddin apuba sülen agiba noksa angur.

Dharamnagar, January 9

(Agencies): Tripura chief minister Biplab Kumar Deb aser pa kinungtsü Niti Deb anema social media nung olulu prokshiba atema police-i Bangalore nung nisung ka puogo.

Iba nisung ya Tripura kübok Dharmanagar subdivision nungi Alkas Uddin lir ta jangjaogo.

"Chief minister Biplab Kumar Deb aser pa kinungtsü Niti Deb na anema social media nung olulu prokshiba atema Bangalore nung onoki Alkas Uddin puogo" ta North district police SP, Bhanupada Chakraborty-i ashi.

Kadamtala BJP Minority Front nung tir Abdul Hanif-i Kadamtala Police Station nung

iba atema ken o ka benoka liasü.

Iba nung ajemdaker North district police-i Bangalore nung Uddin apu aser yakünü Kadamtala Police Station-i anir aruogo.

Hokolbarne pa Dharmanagar district sessions court tsüingdangi anir oa ken o benokogo.

Arunachal Pradesh-i Communist Party of India aiter

Itanagar, January 9

(Agencies): Communist Party of India (CPI) indang kaketshir kongsang All India Students' Federation (AISF)-i Arunachal Pradesh nung tetsüing ajemoktsü renemogo.

January 17, 2021 nü CPI-i Arunachal Pradesh nung mezüingbuba senden amentsü ta osang ajanga ashi.

"Taküm March ita tashi nung Arunachal Pradesh nung CPI state unit tentettsü. State nung yimtenren menden melenshipet melenshiba sobaliba ya Communist Party-i anentsütsü. Communist tangatetba nung bendanga agütsürtem dang part züingsem kümdaktsütsü. Onoki Arunachal yimtenren



Arunachal nung züingsem ajaki chichiba Arunachal tenüing nung noktaksü" ta paisa metetdaksü.

"AISF aser Communist Party-i nüjiso mangudang nungi linük atema bendanga agütsüogo. Linük atema nüjiso maparen nung c o m m u n i s t züingsemtemi shilem agiba kaket nung kanga junga züluoka lir. AISF ya küm 82 tain telok ka lir. Linük nüjiso atema

inyakba maparen nung RSS/ BJP-i shilem kecha magi. Parnoki tamangba yimsü aser kin o kin tsüingda telemsa adokdaksüogo" ta Banerjee-isa ashi.

Communist Party aruba sülen Arunachal Pradesh tashi taitba aser tajungba akümtsü, ta paisa shisem.



Agartala nung anogo 5 nü Adventure Tourism Festival alidang nisungtemi Jet Ski nung amenba noksa nung angur. (Agartala, January 9)

Golaghat nung Minister Sarma dang wako tanak sayu

Guwahati, January 9

(Agencies): Honibarnü Golaghat nung AASU züingsemtemi Assam finance minister Himanta Biswa Sarma dang wako tanak sayu.

Tanü Golaghat jila nung Sarma indang bike rally süidang AASU züingsemtemi Citizenship Amendment Act (CAA) anema pa dang wako tanakji sayu.

AASU züingsemtemisa BJP sorkar aser CAA anema yimyimtem ayim.

Iba mapang police-i lungkak

aitertem senshidaktsütsü merang.

Sarma'er bike rally ji AASU indang office ajanga süidang 'BJP Go Back', 'Himanta Minister Biswa Sarma Murdabad', 'CAA aami namanu' (We won't accept CAA) aser 'Jai Aai Asom' yimyimtem ayimoktsü.

Honibarnü Minister Sarma-i Golaghat nung sentong ka nung adentsü atema aru. Iba sentong nung Congress lennir aikati BJP nung aden.

Raijor Dal tir inyaktsü atema Akhil Gogoi shim

Guwahati, January 9

(Agencies): Assam nung political party tasen Raijor Dal nung tir inyaktsü atema Krishak Mukti Sangram Samiti (KMSS) lennir Akhil Gogoi shimogo.

Hokolbarnü Dibrugarh district kübok Moranhat nung party mungdang alidang KMSS-i pusema nungitba telok nung Gogoi tir inyaktsü shim.

Raijor Dal nung executive president inyaktsü atema KMSS lennirtem Bhasko D Saikia, Kabindra Chetia Phukan aser Jitual Deka nungertem shim.

Brihostibarnü Gauhati High Court-i Akhil Gogoi indang bail

temepishiba magizük. Citizenship Amendment Act (CAA) anema lungkak aйдang ozüing alema mapa inyakba ken o tem nung pa dak tai tonglokja apu.

December 2019 nü tensa azüoktsü mechi nung Akhil Gogoi ya Jorhat nung lia apu.

Iba sülen National Investigation Agency (NIA)-i pa anema ken o ka benok aser tepuokdak yua lir.

Raijor Dal mungdang nung Satra Sangathan, KMSS, Veer Lachit Sena aser artiste fraternity nungi shisatsü meshia liasü.



Guwahati nung tetsür aser teintet rogotem nem angati senzüdaktsütsü atema Assam State Transport Corporation (ASTC)-i pink bus senzüdaktsütsü. Honibarnü Chief Minister Sarbananda Sonowal-i Administrative Staff College nung pink bus garitem sayatsü. (Guwahati, January 9)

Mizoram-i Open Defecation Free Plus State akümtsü

Aizawl, January 9

(Agencies): Mizoram ya kobi melii "Open Defecation Free Plus State" kümdaktsütsü atema mapa inyakdar, ta Mizoram deputy chief minister Tawnluia-i ashi.

Aizaw kübok Phunchawng area aser Lengpui airport tsüingda merükmeju mapa inyakdang pai iba osang metetdaksü.

"Mizoram ya "Open Defecation Free" state ta sangdonga lir. Merükmejuba aser temang anema ayuba ya sendaktepa lir aser kija shiai pei temeket merüka ayutsüla" ta Tawnluia-i ashi.

"Merükmejuba ya kibong nungi tenzüker. Nisung ajaki pei pei temolung nung merükmejutsü aser jana timi endoktsüba angateta ayutsüla. Sorkari state merüka autsü merangba nung kibong, arogo aser NGO shiai yariteptsü ni

ayongzüker" ta Mizoram deputy chief minister-isa ashi.

Iba lokti nübodoka merükmejuba maparen nung NGOs, loktitentet aser media nisung 400 shi kati shilem agia liasü.

Iba sentong nung Aizawl Municipal Corporation (AMC) commissioner K. Laldinglana, Planning secretary C. Vanlalramsanga aser tanga tongti ketdangser aika aden.

Anogoshia AMC telongtet nung jana 1.35 lakh kilogram shi bendener ta ketdangsertemi ashi.

AMC-i Aizawl nung anogoshia jana bendentsü atema medium motor vehicles aser heavy motor vehicles 156 dak tema amshir, ta parnokisa ashi.

Aizawl nung jana anepaluba maparen nung kümshia Rs. 6 crores shi endoker.



TIR YIMYIM YIMOBILEM (EDITORIAL)

DIMAPUR AMUNGNÜ, AENJETI (JANUARY) 10, 2021

TANÜLA NUNG KÜLEMTSÜBA MAPANG

Yisui Samariatsürla dang ashi, “ nenoki iba tenem nung süshia aser Yirusalem nung süshia, tebu dang mekülemtsü mapang arudagi.... Tsüngrembo tanüla aser shiri Pa külemdir tanüla nung aser atangji nung külemtsü tim. Yohan 4:21-24. Tanü ama meimlaba alima tashidak wara agi teti Tsüngrem külemdak oagi tenla kidang Tsüngrem külemba sentep sentong magitetsüsa akümdang, Yisui Samariatsürla dang ashiba o ya bilemtetter. Alima nung nisungtem aikati süngyanglu tapu balala yanglur tenük agi tsüngremji ngua tenem aser arem nung tarongba tenla tapu tapu agüja külemer. Ano, asenok aikati tenla ki tajung yanglua yur, yangji shi nung pei topur ajung aser takatait shisangtepa külemer. Itemji Yisui Samariatsürla dang Yirusalem tenla kidang külemertem indang ashiba purtemji asütsü. Aji oda, Yisui Samariatsürla dang ashiba o ya yashiang Yisui asenok dang ashi ama, tang ya asenoki akhi Tsüngrem külemdak tenla kitem nung Tsüngrem mekülemtetsüba mapang kati menepa aruogo. Iba jagi aiben asenok rongjena bilemer aser akhi ama tenla kidang amangba purtem adenshia Tsüngrem külemner. Ajisüaka, asenoki asenok tamang asadangtsüba kaji, asenoki tenla ki menungrabaji tanüla nung aser atangji nung Tsüngrem külemnüba agi asü mesüra lokti tekülem aginüba kisüng agi menungrar ? Ibaji khen asensasa sarasadema bilemdangtsü kanga nüngdaker. Tsüngremi tamasayongi asenok ya tanüla nung Pa külemtsü asoshi yanglu aser alima nung toktsü. Yisui Samariatsürla dang ashijaji, asenoki Tsüngrem külembaji tenla kidang oagi lokti sentep agiba mesüra tenem nung tuagi tarongba tenla agütsübaji masü saka tanüla nung asenoki Tsüngrem jakji ngua Pa tenüng asangba aser Paji dang asen taküm nung kibur aser temeim agi sünga aliba Tsüngrem ta agizükteta asen mulungjang, shisatsü aser tanüla ajak agi Pa den jembibajiang, shitakba Tsüngrem külembaji lir. Kodang asenoki Tsüngrem tashi aser taochi uluba indang angateta külemdir, idangji asenoksasa asenok dak aketba temenen aser tashimaittem angutsü aser taidok nangzük tenzüksü. Ibajiang shitakba tanüla nung Tsüngrem külemba taküm aser mapangji asütsü. Aji oda, kodang asenoki tebu Tsüngremji tanüla nung külemdir, asenok dangi tanüla temeshi tashi balaka arutsü aser iba jagibo asenok dang tekülemdaki tenemia tou aser Yirusalema tou asüyonga ajemajema kidang mena mekazütetsü. Kasaji kodang Samariatsürlai Yisu dak amanga tanüla nung la mulungjang nung Pa külemtsü tenzük, lai yangji ajemajema mekazütet, anungji yakta dang yimtaki orr nübertem dang la taküm nung Khrista ajuruba indang kuli asütsü tenzük aser iba kuli jagi yimti nung alirtem aika Yisu dangi anir aru. Asenok küm paikaya tenla kidang oagi Tsüngrem külemba o temenen agi sünga aliba Samariatsürlai Yisu ajurua la mulungjang nung Yisuiji Khrista ta amanga tanüla nung külemba ajanga tangar taküm aser kibong nung dena temelenshi adokdaksüba naji medemdangra, asenokbo tekülemer masü saka tangar tekülemer jilu ajizüka yazü nung külemertem liasü ta asenoki asenoksasa asen tashimait meteta arutsü. Asenokbo tenla kidangbo tenla kidang, saka tanüla nung Tsüngrem o mejembir, tanüla nung sarasadema masür aser tanüla nung kena matener. Ibaji kodang asenoki jungjunga bilemdangdir, asenok ya kechi aser shiba külemer asütsü ? Yisuiibo ashir, tenem nung külembaji masü mesüra Yirusalem nung külembajia masü, saka kong lidir liaka tanüla nung aser atangji nung külembaji dang Tsüngremi aginür, kechiyong Tsüngrem külemba ya tamangba yimsü ka masü saka Tsüngrem tushiba aser Tsüngrem den jembiba mapa aser mapang lir. Tsüngrembo tanüla, anungji asenoki shi nung Pa den jembira, iba tekülem mapangji amajok asütsü. Tanüla nung Tsüngrem külemba tetezü shi tejangraba, taginüba, tenükshiba aser tebilemba kecha maden, Tsüngrem dak dang amanga Pa nem pei taküm, kibong aser pei sentong bendanga agütsüba mapa aser mapang lir aser iba mapangji tang ya lir.

OLEMSABANG HINDU YIMDEN YIMSÜSÜBA KÜBOK KHRISTAN TEINYAKTSÜ

~ Wati Longchar (Serampore)

India nungersü otsü nung, Hindu yimsü amangertemi India ajonga yimden ka kübok kodanga azüoka yimsü mesüdag. Chuba ka küboka India kodanga melidang. Ibai India litsü, iba arrtsü nungi iba tashiji "India" ta country-a jateta mali asü. Mughul yimli yimsüsüba ya tashi taitba rongnung ka liasü aser parnoki küm 330 shi (1526-1857) yimsü asü, saka North India nung dang par yimsüsüba kübok azüoka yutet. Mughul yimli sülen, British yimli kübok India küm 100 ka shi liasü aser British yimsüsüba mapang nungiang tanü koba India telongtet litsü lir iba ya tejangja kümtet. Hindu yimsü amangertem 82% süaka parnoki putu aika dang yimden azüoka meyuteti aru. India nüjiso ngur külen, lokti teimbai mulungba yimden yayim benoker külen, 2014 küm nungiang Hindu temejai kümtetba yimden tazüokba küboki aitogo. Tanü India Hindu empire nung alir ta ashitsü akok. Nagaland state, Khristan 99% aliba state ka ta alima dang tejak tentet tenteta jembia aruba, joko Hindu yimden tazüokba küboki aitogo. Reprangangma atangji, Nagaland nung taruba 2023 tatashim toktep mapang nungjibo BJP ticket agi rakteptsü. Sen agi Nagaland lima ayoktsü. Tanü India lima ajunga Hindu yimli kümdaktsütsü asoshi temzüng balala yangluba aser yanglushiba, par yimsüyimpong tashiyim agi beshidaktsütsü mapadong balala asaba mapang ka lir. Iba ama tensa ka nung arogo noktaka lir. Khristan ka ama, aser arogotemi kechisa inyaksü nungdaker yangi olen kar lemsateper.

TAMANG YIMSÜI YIMDEN MAPAREN BALALA METENDAKTSÜBA

Yimli ka akhanga yangertsü aser züina odaktsütsü atema tamang yimsü ya kanga tongtibang. Tamangba yimsü ajanga nübur lungjemdaksür, aria bilemdaksür aser inyaksü temulung uludaksür; tamang yimsü asoshi inyadang taküm agütsübaji tetoshi maparen ka kümdaktsür. Anungji yimden leniri tamangba phuküm asütsü; yimsüsü kechisa asateta inyaker aji meimchiri mulungba dang masü, Tsüngremi mulungba ta nübur mulungsentsü nung enoktsür. Tamangba yimsü tesayur, sayutsüngir, mangdang amshitsü; India nung BJP-i ama, tawa US election mapang President Trump-i tamangdir-shiner kanga amshiba nguogo. Parnoki metet, tamangba yimsü maten yimli kaji nokdaksü makok. Yongji yimsüsü ajaki tamang yimsü tesayuba ajanga nungitdaksüner aser asa lendong yanglur. Mitri Rehabi züluba ya külenbo shitak, "Yimli kaji sepai, yimden aser rongsen tashi agi dangbo arakmoka ayutsü makok. Saka parnoki kechisa inyaker aji shitak, temabai melaba (tsüngremi melaba) ta sayutsüla. Parnoki nübur anema tashiyim inyakba ya tamang tesayubai metendakja mapadong aser mapa ajak tamang den sendaktepa kümdaktsüba ajanga yimli kaji nokdakteter." (Empires can't survive by their military, political and economic power and might alone. Rather, the justification of the empire has to be based on a higher logic; the violation of human rights needs to have something akin to divine purpose and to be set within an ideological framework.) Hindu yimli akang akanga yangertsü asoshi India ajonga nung yimjak nung lenirtemi lokti terenlok, lokti tejakleni odaktsütsü ta jembir, aser küm ishika tsüngda nung India rongsen ketsüng maparen nung No.1 akümtsü ta sangoktsüba angur, saka telung nungbo kanga dang "systematic and strategic" süa India ajonga Hindu yimli kümdaktsütsü asa lendong nung bener aoba angur. Yimden yimsüsü Hindu yimsü ajungketja jembiba (Muslim leniria kasaji jembir), tangar yimsü anema tesempa o jembiba (hate speech), tamanger telok balala rongnung rarabangsen adoktsüba, tekülem ki rongdoktsüba aika ajurua arudagi. Item ajak ya tamanger telok lemsadaksütsü asoshi inyaker ta metetsüla.

INDIA RANGPEN NUNG HINDU YIMSÜ BENOKTSÜ NÜKLA

Tanü India nung BJP-i aniba yimten yimsüsü nükjidong tulutibaji India ya Hindu yimsü nung amendaker "Hindu Rashtra" yangertsü ta asübaji lir. Küm 300 tema Mughul yimsüsüba mapang nungi Hindu aser Muslim na tsüngda rishikangshitep, raratep aser azü tokshitep aika ajurua arur. Tanü tashi Hindu nungeri Muslim nunger ya ainer aser tsükchir tulutiba ta züngshir. Atangji, Mughul yimsüsüba mapang Hindu nunger aika rishikangshi aser tashiyim agi amangdaksü; Hindu nunger tekülem ki 60,000 shi raksatsür yangji mosque yanglu ta Hindu nungertemi ashir. India British yimli küboki aiter, 1906 nungi Muslim League aser Hindu Maha Sabha political party tamang yimsü dak tera yanger tentet. Party anapronglai pei tamangba yimsü wazüka ayutsü, sayutsü aser züina odaktsütsü nükjidong nung mapadong aser maparen ajak toktepa inyaka aru. RSS, Jan Sangh, BJP, VHP, Shiv Sena telok ajak ya Hindu Maha Sabha nungji jakzüka aoba aser Hindu tesayuba dak ajemdaker tentet. Talisa, tamang yimsü isab nung India aser Pakistan ta country ana küma lemdangba mapang, azü dokshi jendi den, rongsen aser nisung aika timtem ajuru. Kar India nungi Pakistani, kar Pakistan nungi Indiai ta belenteptsüsa aküm. Pakistan nung Islam ya state religion ta agizüka, aser Quran tesayuba nung tera yanger yimden latet yanglua bener arur. Tanga yimsü tat. agi, Hindu, Khristan second class citizen amai amshir aser rishikangshir. Kesaji India nunga Veda teyongtsü südaktsür India ya Hindu country ka ta jateta yangertsüla ta Hindu tentet telok balala aikati jembia aser inyaka arur. Hindu Maha Sabha lenir Vinayak Damodar Savarkar-i (1883-1966) India ya Hindu lima. Hindu dak alaka tangar ajak ainer. Muslim aser Khristan lisopur masü nungji parnoki künü ashioptsür aotsü. Lenük meimer (Nationalism) ta asübaji Muslim nunger ket nungi kümzüka ayuba amai angatetdaksü. Hindu tamang yimsü kübok India lima "single race, single culture and single religion" akümtsüla aser Hindu yimden yimsüsüba aser rongsen ketsüng maparen ajak bener aotsüla ta noktak. Hindu yimsü ya state religion ta sangdongtsüla; Muslim aser Khristan tamanger ya India raksatsütsü alir, bendanger tamang yimsü ka ta ashir. Parnok India nung linüra Hindu akümtsüla. Hindubo mekümnner saka India nungsa liner ta süra tashiyim amshia, amokmerena aridoktsüla. Iba tangatetba nung tanü Hindu fascist teloki mapa inyaka arudagi. Iba tensa ka nung tan? Khristar arogo noktaka lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Philippines nung Muslim nunger telok kati Tenla ki karaksatsü



Philippines nunger Khristantemi Paranaque yimti nung aliba Tenla kidang milen tsükloker sarasademba mapang tangokba noksa nung angur.

January 09, 2021: Philippines nung Muslim yimsü alia amanger lanur telok kati injang agi Tenla ki ka aser kürakyanglutem khasatsü. International Christian Concern (ICC) osang ajanga ashiba agi, December ita nung Islamic State kiralongrar telok den sendaktepa aliba telok-Bangsamoro Islamic Freedom Fighters (BIFF)-i jila nung sepaitem aser police outposts amakba sülen Tenla kiji amak. Minute 15 shi khatepba mapang nung Tenla ki aser kürakyanglutemji injang agi khasatsü. Police aser sepa ketdangsertemi ashiba agi, BIFF-isa St. Teresita Tenla ki aser Arogoi ketdangsüba Notre Dame of Dulawan high school raksatsütsü sentong liasü, ajisüaka police aser sepaitemi nokdangtet. Tenla ki amakba jakdang BIFF-i Datu Piang nung police

station ka amak aser police patrol gari ka rongdokja liasü. Tamalen BIFF kiralongrar ana apuba sülen parnoki mangyanga police station ji amak, ta osang angazüker. Kiralongrartem jagisa ki aika dak injang khalokja liasü. BIFF ya Islamic separatist telok ka lir, aser parnoki linük nung Muslim minority, Moro nunger atema independent Islamic state ka akhanger. Moro nunger ya talisa Philippines kübok Mindanao region nung alir. 2014 küm nung BIFF züngsemtemi ISIS tongti lenir, asür Abu Bakr al-Baghdadi pusemtsü tenangzükba agia liasü. Philippines ya Khristan nütsüng timba aliba linük ka lir; iba linük nung nütsüng shilem 86 bo Khristantem lir, ajisüaka tesüiba küm ishika tsüngda IS telok den sendaktepa aliba Islamic kiralongrartemi kanga

timtem agüja arudar. Yaküm August ita nunga Jolo yimti nung ISIS kiralongrartemi temang nung bomb alenloker amakba mapang nung sepa tenet, civilian trok aser police ka asü. Jolo jila ya Muslim Sulu province kübok lir aser iba province nung nütsüng timbaka Roman Catholic Khristantem lir. 2019 küm nunga kiralongrartemi bomb ana amshia Lady of Mount Carmel Tenla ki amakdang nisung 20 asü aser 100 shi yirua liasü. August 2019 nunga Mindanao asetkong nung kiralongrartemi Antipas, Cotabato Province nung aliba United Church of Christ nung pastor, Ernesto Javier Estrella khaseta liasü. 2018 küm June ita nunga Zaragoza jila nung kiralongrartemi Catholic putir, Richmond Nilo Tenla kidang khaseta liasü.

Karnataka kübok yimtsüng ka nung Khristantem tekülem sentong nokdang

Washington D.C., January 09 (Agencies): India kübok Karnataka state nung ketdangsertemi Khristan telok kar tekülem sentong agiba nokdangogo, ta International Christian Concern (ICC) osang ajanga metetdaksü. Ketdangsertemi ashiba agi, Khristan 50 pronglaji tasodang nungi Khristan asüba masü, saka kari mesüzüka mesüra ashikülak agi Khristan yimsü agizükdaksüba lir, ta ashi. January 4, 2021 nü Deputy Superintendent of Police (DSP)-i Karnataka nung Hassan district kübok Bannimardatti yimdak Khristan kibong 15 senden kati jaok aser senden nungji DSP-i Khristantem dang, nenok Khristantem lir ta kuli sayuang, ta ashi. DSP-isa, nenoki Khristan aser Hindu naprong tenüng amer sorkari agütsüba teyari ajak agir, ta Khristantemji aija

liasü. Iba sülen DSP-i Bannimardatti yimdak Khristantem tekülem sentong magitsü atema tetuyuba agütsü. Ketdangsertemi ashiba agi, Bannimardatti yimdak Khristantemji ka danga tasodang Khristan asüba masü saka kari mesüzüka Khristan yimsü agizükdaksüba lir, ta aitsü. International Christian Concern (ICC) den jembidang Khristan kati, "Iba ya Hindu yimsü alia amangertemi police tashi amshia Khristantem tekülem sentong agiba nokdangdaksütsü atema inyakba lir. Parnoki tasa aika merangdangogo; Khristantem loktiliba nungia jendok aser süng agia züka liasü. Ajisüaka yangi aliba Khristantemi maneni pei tamang jenjang nung akanga nokdaker," ta metetdaksü. ICC den jembidang pastor kati, "Onok yimsü benshia onok

adenshir külemtsü atema temeden magütsür. Tamangba yimsü balala tsüngda tesendaktep tepilaba akümer aser Karnataka state sorkari anti-conversion ozüng benoktsü merangdar, iba ozüngji agizükra ano Khristantemi reshikangshi taliba ajurutsü," ta metetdaksü. Tawa BJP-i aniba Karnataka state sorkari tamangba yimsü meyipba nokdangtsü atema anti conversion ozüng tasen ka benoktsü telemtetba agiogo. BJP sorkar aliba state tem-Madhya Pradesh, Assam aser Haryana-ia anti-conversion ozüng agizüktsü ta sangdongogo. Tang India nung anti-conversion ozüng aliba state temji- Odisha, Madhya Pradesh, Arunachal Pradesh, Chhattisgarh, Gujarat, Jharkhand, Himachal Pradesh, Uttarakhand aser Uttar Pradesh state tem lir.

ANO GO ABEN TSÜNGREM DEN


Taküm O - Luke 24:32

Shirnoki Yisu nenedaka bushir parnok den pa atener. Nisung Emmaus leman nung Yirusalem nung kechi atalok iba indang jembia liasü. Iba anogo nung kechi atalok aji angateta lir ta parnoki bilem saka Yisui ashiba o nung parnok Tsüngrem tsütsü aser parnok lima nung pa mapa agi parnok ratadaksü. Parnoki Yisuji Messia ta imla, saka pa asüba agi parnok ratadaksü aser tasü meiti aküm. Parnok telangzüba aser nüngdaka liasü. Tsüngremi temulungjang repranger aser pa chirtemi ochi shia pa bushiba metet. Yisu parnok anasa ao, parnok den jaja aser Laishiba nung pa indang shia aliba angatettsü. Parnok mulungjang lapoktsü. Yisui jembidang parnok temulungjang nung arung. Parnok terata sama, tepela agi kokdaksü aser parnok tepela lemsateptsü medemer dangi ao. Ne taküm tia nung na ratamatadang Yisui Laishiba ajanga item nisung ama dang angatetdaksüba ama ne danga angatetdaksütsü. Meimchir tsütsü nungi ne tia tebangkatsü aser tasü maittsü tia asütsü akok. Iba yagi Laishiba nung ochibaji angatettsü Yisu atenba lidaktsür. Ne tiai na ratadaktsür asü? Yisu atenba nüngdaker. Kodang nai pa nungi angashidir, na item nisung ana amaji asütsü aser tepela agi Tsüngremi na meketa kechi inyaker idakji atentsü. Tangara ne den tendaktsütsü merangtsü.

Sudan nung Tenla ki rongdoktsüba ken o nung tain ka aitsür

January 09, 2021: Taoba tentetsang aser Tir, Mervyn hopta Sudan nung Geriza state Thomas-ia Sudan nung Tenla ki kübok Tamboul nung Sudanese rongdoktsüba tatalokba aija Church of Christ (SCOC) liasü. indang Tenla ki ka rongdokja liasü. "Mapang talangka nungi iba denomination-i amokmeren aser reshikangshi ajangshia aruogo. Christian Solitary Worldwide (CSW) osang ajanga ashiba agi, Kümlem sensotem aser January 3, 2021 nü arrshi küm ketdangsertemi aiben parnok tebur chanu kati petrol amshia anema inyaker," ta Thomas-i Tenla kidangji mi senoka ash. rongdoktsü; tain kati pa dang "Onoki Gezira state nung tuyuba nung ajemdaker pai ketdangsertem dang Tenla ki Tenla kiji rongdoktsü. rongdoktsürtem aputsü aser Tenla ki rongdokba sülen temerenshi agütsütsü atema anogo asem lir police-i takhangba agütsür," ta paisa tebursang anema ken o ka metetdakja liasü. benok, saka pa nem petrol Ano külen Sudan nung agütsüsang tain ka anemabo ken National Centre for Curricula & o mebenoki liasü. Educational Research Director, Dr Omar El Garai-ia pai Tawana yangji aliba director menden nungi anentsü Muslim nunger aser shidi zülüogo. Ato kilonser, ketdangsertemia iba Arogo Abdallah Hamdok-i Centre anema aiben inyaka aruogo. sorkar dang school curriculum General Intelligence Service nung terenlok mapatem tangsa (GIS)-ia Arogo lenirtem aiben anenang, ta tuyuba sülen Omar- jaoka asüngdangyaa liasü, aser i sodi meshir. tang tesüsa 2020 küm Kiralongrartemia Omar tatembanglen-a ketdangsertemi tepsettsü, ta sangdongogo. Arogo lenir, Ibrahim Toto Kafi Tang mezüng Sudan linük jaoka pa dang asüngdangyaogo. nung school tem nung tamangba SCOC ya talisa Nuban yimsü ajak kasa züngshitsü denomination lir aser tamangba asalentong yanglur inyakba denomination lir aser tamangba mapang nung Ato kilonseri iba aiben tim temeden magütsür. telemtetba anema tetuyuba Christian Solitary Worldwide agütsü.

OLONG PAITEP # 5689



TIPIEN

1. Nisung jenti - (5)
4. Tsük rudenba - (5)
6. Temzüng tesashi - (5)
8. S _ _ _ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 5688 TELANGZÜBA

TIPIEN :

2. Bangsemo, 6. Tiptem, 8. Jen,
9. Talila, 11. Aren, 12. Tzübo, 14. Alia,
16. Angati, 17. Odi, 18. Azü,
19. Sünglang.

LANGTSÜNGLEN :

1. Yipten, 3. Nüja, 4. Sangro, 5. Milen,
7. Tulu, 10. Laza, 11. Aben, 12. Tiyong,
13. Ajizük, 14. Aitsü, 15. Tasa, 16. Aina.

Agüja aliba noksa nung meputepi aliba 10 bushiang



TANÜBO NAI LANGZÜANG

Q. National Metrology Conference 2020 indang omen ji ____ lir.

- A. Metrology for the Exclusive Growth of the Nation
- B. Metrology for the Growth of the Nation
- C. Metrology for the Inclusive Growth of the Nation
- D. None of the above

===== (Taruba adok nung onoki langzüksü)

YASHI ADOK TELANGZÜBA : .Iran

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Tepela Tasoba Anogo



1. Tentüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAI-A YA METETTER MA?

TAOBA MAPANG JANUARY 10 NÜ ATALOKBA KAR:

- * Roman emperor Galba-i Marcus Piso Licinianus ya Caesar ama agizük.
- * St Fabian-i Catholic Pope ama inyak tenzük.
- * Robert Guiscard-i Palermo yimti makdok
- * Hebrew, Aramaic, Greek & Latin nung Complutensian New Testament renem.
- * Charles Farnese ya Parma aser Piacenza indang Duke aküm
- * United Kingdom nung India nungi mezüng süngo (Tea) tonga aru.
- * 205 W 46th St NYC nung Lunt-Fontanne Theater (Globe) lapok.
- * Australia aser South Africa tsüngda cricket asayaba mapang, Victor Trumper (Australia)-i double century (214) yanglutet.
- * Oslo, Norway nung speed skater Oscar Mathisen-i second 43.7 nung meter 500 tashi skate süa otsü yanglu.
- * Paris nung League of Nations tenzükba sentong agi.
- * England aser NZ Christchurch na asayaba mapang Maurice Allom-i Test hat-trick agi.
- * London nung UN General Assembly indang mezüng senden amen.

SUDOKU # 5730

	3		7		1	2	5	6
		6			5			8
		1		3	6	7		4
	7	5	4				3	
				1		6		
			2	7	9	1		
9	2			5			7	
		7			2		6	
	8	4						

TELANGZUBA # 5729

1	6	2	3	5	4	9	8	7
8	4	3	2	9	7	5	1	6
5	7	9	1	8	6	3	4	2
6	3	5	9	4	8	7	2	1
7	9	1	6	2	3	8	5	4
4	2	8	5	7	1	6	9	3
9	1	7	4	3	5	2	6	8
3	5	4	8	6	2	1	7	9
2	8	6	7	1	9	4	3	5

OJANG LUTEP # 5277

- JETAM :
- LMAI :
- ENEBR :
- BAARU :
- AKAJ :
- KODOKNGAER :
- TSTACHIÜ :
- JUNMAG :
- MTI :
- TEAM :

OJANG LUTEP TELANGZÜBA # 5276

INYAKTSÜ JANGRA YONGJIA TANTSÜR ASER TAMBUR
KÜMERBO TASHI AGI MAKOKER

TAN HOPTA ATEMA - KOMA SÜLA ?

Q. Nagaland nung government mapa nung backward kintem atema reservation ayuba ya kin apia (tribe wise) masü saka kibong nung senotsü ajangzüktetba apia (economic status) ayu nunga koma süla ?

Olong 20 shi nung January 15, 2021 tashi nung iba telangzüba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.



January 09, 2021 nü New Delhi nung video conferencing ajanga Ato kilonser, Narendra Modi-i Pravasi Bharatiya Divas sentong nung jembiba noksa nung angur.

Aluyimertem pusema Congress-i January 15 nü longkak aittsü

New Delhi, January 09 (Agencies): Aluyimertem pusema January 15, 2021 nü Congress party-i linük tesem ajaklen longkak aittsü; tang aluyimertemi Centre sorkari benokba aluyimba ozüing tasen asem anema longkak aitdar.

Centre sorkar aser aluyimertem unions balala tsüingda senden 8 benbuba amenba mapang nunga telemtetba magitetba sülen Congress-i aluyimertem pusema longkak aittsü lemtetogo.

January 15 nü sorkar aser aluyimertem senden amenba anogo nung Congress-i longkak aittsü.

Hokolbarnü Centre aser aluyimertem senden amenba sülen Congress Tir, Sonia Gandhi-i party general secretaries aser lenirtem dang aluyimertem tebilemtsü onük

nung party asalentong yangluang, ta tuyua liasü.

Yamaji Honibarnü Congress general secretary (organisation), K.C. Venugopal-i video conferencing ajanga party nung külem tenzükertem den senden mena aluyimertem dak sendakba onük nung o lemtapa liasü.

Tesüiba ita ka dak tema aluyimertem Delhi arrtsülen adenshir longkak aitba mapang nung aluyimertem 60 tashi süogo.

Honibarnü senden nung Priyanka Gandhi Vadra densema Congress lenirtemi, longkak aitba aluyimertemi opposition lenirtem den pilaa alitsü meranger, ajisüaka tongti Opposition party ka ama Congress-i linük nung aluyimertem pusema nokdaker, ta bangjama liasü.

Yaküm tzüngluruwa mongpu

Parliament senden nung sorkari aluyimba ozüing tasen asem benokba mapang nung Congress-i dang masü saka tanga Opposition party tema aikati aluyimba ozüingtem anema nokdaka liasü.

Osangbenertem den jembidang Congress otongdar tongti, Randeep Surjewala-i, "Congress party-i aluyimertem den nokdaksü. Party-i January 15 nü Kisan Adhikar Divas amongtsü lemtetogo. State aser union territory ajak nung Congress-i Raj Bhawan-i oa ozüing asemprong agienang ta akhangtsü," ta metetdaksü.

Congress-i state units ajak dang January 15 nü mener longkak aittsü tuyuogo aser state yimtibatem nung party lenirtemi longkak aitba sentong agiba sülen Raj Bhawan-i oa ozüing asemprong agienang, ta akhangtsü.

UK MP 100-i India PM den aluyimertem onük süoka jembitsü mepishi

Jalandhar (Punjab), Aenjeti/ January 09 (Agencies): United Kingdom nung party balala nungi MP 100 dak temai Ato kilonser, Boris Johnson nem India nung aluyimertemi longkak aitba tebilemtsü indang metetdaksüba den külemi pa dang India Ato kilonser, Narendra Modi den iba onük lemtptsü mepishi.

UK PM Boris Johnson dangi züluba shidi nungji MPs aser Lords-i sign süa lir, aser iba shidiji yimjak nung metetdaksü.

Slough MP, Tanmanjeet Singh Dhesi-i, "Nai India semdangtsü aliba thinenogo, ajisüaka kobi melii nai India Ato kilonser ajurutsü. Iba onük ya kanga tongtibang, anungji nai India Ato kilonser dang tang tensa tekarakba nung bentettsü aser sensotemi democratic temeden amshia longkak aittsü atema jembitsüla," ta metetdaksü.

Kasa shidi nungji Punjab aser aser India tesem balala nungi arurtemi India nung longkak aiter aluyimertem dak

tashiyim amshiba atema tebilemtsü akaba lemsatepa lir.

Iba tebilemtsü onük ajanga bendanglen alir India nunger, talisa Punjabi mesüra Sikh nunger aser India nung aluyimertem den sendaktepa aliba nisungtem jashir, ta shidi nung shia lir.

Tamalen-a UK nung party balala nungi MP temi shidi ka ajanga Foreign secretary, Dominic Raab dang India ketdangser den aluyimertem tebilemtsü onük lemsateptsü ajungshia liasü.

Covid vaccine ji ajak nem angati agütsütsüla: Delhi CM Kejriwal

New Delhi, January 09 (Agencies): Honibarnü Delhi Chief Minister, Arvind Kejriwal-i Centre sorkar dang linük nung senso ajak nem coronavirus vaccine ji angati agütsütsüla ta mepishi.

Arvind Kejriwal-i twitter ajanga, "Tan Aso nung wara tulutibaji coronavirus lir. Iba wara nungi asen nüburtem kümzüka ayutsüji kanga tongtibang. Nisung ajaki iba vaccine angati angutsü atema ni Centre sorkar nem inyakdaksüner. Iba vaccine nung sen indokba ajanga taküm aika kümzüksü," ta metetdaksü.

Taoba hopta Delhi Health Minister, Satyendra Jain-i, "Vaccine agizüksü, rizünga ayutsü aser mezüngbuba shilem nung risk group nung aliba nisung lakh 51 nem COVID-19 vaccine agütsütsü atema Delhi sorkar renema lir. Delhi nung nisung ajak nem iba vaccine angati agütsütsü," ta metetdakja liasü.

Honibarnü senden ka ayongzüka Ato kilonser, Narendra Modi-i coronavirus tensa asadangba sülen sorkar

sangdong ka ajanga, novel coronavirus anema January 16 nungi vaccine agütsütsü, ta metetdaksüogo.

Sorkar sangdong ajanga ashiba agi, Covid-19 vaccination drive mezüngbuba shilem nung healthcare workers aser frontline workers crore 3 jungnüa nem iba vaccine agütsütsü.

Ato kilonseri, India nung vaccination drive ya alima nung vaccination programme tulutiba asütsü, ta metetdaksü.

"Senden nung tensa asadangba mapang- Lohri, Makar Sankranti, Pongal, Magh Bihu ama benjungtem aliba nung ajemdaker COVID-19 vaccination January 16, 2021 nungi tenzüksü lemteta liasü," ta sorkar sangdong ajanga metetdaksü.

Healthcare workers aser frontline workers nem tama vaccine agütsüba sülen arrshi küm 50 ser temapurtem aser co-morbidities keta alir arrshi küm 50 tekübokpurtem (ana senteper crore 27) nem iba vaccine agütsütsü, ta sangdong nung shia lir.



Gandhinagar, January 09, 2021: Honibarnü Gandhinagar nung Congress lenir, Madhavsingh Solanki arrshi küm 93 nung süogo. Solanki ya taoba mapang External Affairs Minister liasü aser Gujarat nunga pezüben tashi Chief Minister inyaka liasü.

Bird flu: UP, Haryana, Punjab aserOdishanunga ozü aika süogo

New Delhi, January 09 (Agencies): India linük nung Kerala densema state pezü nung Bird flu jangjaba sülen Haryana, Punjab, Odisha aser Uttar Pradesh state tem nunga ozü jenti asüba osang Centre nem metetdaksü.

Brihostibarnü Centre nungi team kati Kerala kübok Alappuzha nung bird flu aliba tesemtem semdanga liasü. H5N8 virus wara agi Kerala state tamajungba kongshiogo; Himachal Pradesh, Rajasthan aser Madhya Pradesh state tem nunga samples tendanga iba wara aliba jangjaogo.

Centre nungi nisung asema akümiba team kati bird flu agi kongshiba tesemtem- Karuvatta, Pallipad aser Thakazhi semdang. Parnoki iba sülen sorkar nem report renema agütsütsü.

Bodhbarnü Uttar Pradesh kübok Sonbhadra nung waro aika asüba sülen samples tendangtsü atema yoka liasü.

Punjab nunga Gurdaspur district nung waro pezü den tzü ozü ka asü.

Brihostibarnü Himachal Pradesh nunga Kangra district kübok Pong dam awatsüing anasa tangalen nungi aruba ozü 355 sür angu, aser ibaji densemabo tangalen nungi aruba ozü ajak agi 3,410 süogo.

Odisha nunga Khruda district nung an 120 asü, ajisüaka an ka dak danga iba virus meputet, ta Fisheries and animal resources department Director, Ratnakar Rout-i metetdaksü.

Rajasthan nunga Bodhbarnü ozü 297 sür anguba sülen Brihostibarnü-a ozü 375 sür angu.

National Disaster Management Authority-i item state ajak nungi health & animal husbandry departments nungi ketdangsertem aser State Disaster Management ketdangsertem den senden mena iba wara nokdangtsü atema o lemtepogo.



January 09, 2021 nü Bhubaneswar nung Bindusagar tzübo merüktetba sentong nung Union Minister of Petroleum & Natural Gas & Steel, Dharmendra Pradhan (abelen nungi tanabuba) aser Bhubaneswar MP, Aparajita Sarangi (abelen) na den tangartem adenba noksa nung angur.

Tir asütsü Trump metemsü: Biden



Joe Biden (File photo)

Wilmington, Aenjeti/January 9 (Agencies): President-elect Joe Biden-i ashiba agi, tir Donald Trump ya mapa asoshi tetemsü masü, saka Democrat temi tang agi tanabenbuba pa mapa nungi agintsü nongshibo pai pumasemer.

House Speaker Nancy Pelosi-i, la indang chamber züngsem dangi shiti ka nung ashiba agi, tiri mapa metoktsüra U.S. Capitol amakertem ajungmesoba atema ozüng yanglurtemi taruba ita tashi nung Trump mapa nungi agintsü asoshi jenjang agitettsü. Pelosi aser Democratic Senate leniir Chuck Schumer nati Vice President Mike Pence aser Cabinet dang Trump mapa nungi anendaktsütsü atema 25th Amendment benoktsü shiogo; iba inyakyim ajanga tir mapa nungi agintsü aser tatong tiri mapa belenzüksü.

Hokolbarnü Delaware nung osangbenertem den sensaksemba mapang Biden-i, pa tir atema toktepba kuli rongnung tongtiban kaji pai Tir Trump ya iba mapa asoshi tetemsü masü ta bilemba ajanga lir.

"Ni küm ka dak tema iba ya shiyonga aruogo; pa mapa asoshi tetemsü masü. Pa ya United States of America puti otsü nung tir asütsü metemsüba tir rongnung ka lir.

Ajisüaka pai Trump White House nungi agintsü atema inyaktepba pumasen aser ashiba agi pa mapa nungi agintsüba ya Congress dak keta lir. Iba melena Biden January 20 nü nungi pa mapa tenzüksüba dak rangloker lir. Paisa, pa atema tinyaktsü tongtibangtiba asemji; coronavirus den rara akoktsü, vaccines tebandang makai agütsütsü aser rongsenketsüng raksar aliba asüngsashitsü, ta ashi.

Pai Trump aser pa indang administration aija arudar, saka administration tasenbai kechi inyaktsü, iba dak nüburtem rangloker lidaktsütsü asoshi inyaka arudar.

"Ita trok shi anunga alia asübo pa office nungi agintsü atema takokba tashi inyakla, ajisüaka ni tang tir aser tatongtir mapa belenzüksü atema rangloker inyakdar aser onok sentongtem akokba tashi takaratiba nung bener aotsü merangdar," ta Biden-i ashi.

Trump ya tirtem rongnung mapa nungi anaben tashi aginba mezüngbuba tir asütsü. House-i pa 2019 küm tatemlen mapa nungi agin saka Republican-i aniba senate-i pa maitsü. Mapa nungi aginba ajanga Trump 2021 küm tir election nung shilem magitettsü mesera tir mapa mebenettsü.

Bodhbarnü longkak aiter noklang aikati Capitol maka teraksatsüba bener arutsüba ya

Republicans tem aika densema Democrats temi Trump dak tai tongloktsüogo. Congress-i electoral votes azüngba mapang longkak aittsü atema tir-i ajungshia liasü. Iba lendong nung Capitol Police officer ka densema nisung pongu asü.

Biden-i iba tatalokba ya kanga tia maka tatalokba ka ta shiogo aser United States tiri ajungmesoba ajanga atalok ta ashi.

Biden-i mapa belenzükba sentong nung shilem magitsü sentong lir Trump-i tweet asüba sülen ghonda ishika lir president-elect-i iba olen lemsatapa liasü. Biden-i ashiba agi, tenanzüktepba agiba sentong nung Pence arua dendaktsüner saka pai Trump atemabo kasaji mebilemer.

"Künapronglai haihaora akaba onük rongnung iba ya ka asütsü. Pa marubaji tajungba," ta Biden-i ashi.

Kasa mapang nung Biden-i Hokolbarnü Senate den sensaksemogo, koba Democrats-i tera agi kokogo. Hopta tetenzüklen Georgia nung takok anguba sülen Senate nung parnok züngsem timba kümogo. Pa indang cabinet ochishia aser takaratiba nung shimtsü nükjidong nung pai iba jenjang agia liasü.

"Linük nung anogo ishika tsüngda tatalokbatem asadangser January 20 matong tsüngda parnok jangjatsü nüngdaker," ta pai ashi.



Jerusalem nung vaccination center nung Pfizer COVID-19 coronavirus vaccine agiba sülen Amram Cohen tangokba noksa nung angur. Israel nung coronavirus tashidak poteter timba küma odar aser ketdangsürtemi tenokdangba tesashi agütsüogo. School aser shishilembadak timba Hokolbarnü nungi shibangogo aser hopta ana atema lokti senden magitsü atema tetuyuba agütsüogo.

SANGDONGER

Asür A. Masasosang Longkümer Changtongya par jabaso Sobulemba aser Tsükjemtozüng parnoki alu ali kimong par tataba shilem dak tali ayok. Joko anünga akaba kimonglumong kecha nunga parnok maten. Anungji parnok dang shingaia yokyashinü kimonglumong kecha malitsü metetdaksür. Kari alira talir khuret asütsü.

1. Mr. Nokpangmanen Longkumer, Changtongya
2. Mr. Chubainba Longkumer, Changtongya

China nung Covid-19 vaccines angati agütsütsü

Beijing, Aenjeti/January 9 (Agencies): Nüburtem atema vaccine renemba sülen China-i Covid-19 vaccines angati agütsütsü, ta sorkari ketdangsertemi Honibarnü metetdaksü.

National Health Commission official Zheng Zhongwei-i, vaccine yangluba aser belenshiba nung sen intoktsü, saka sorkari nüburtem nem vaccine angati agi agütsüttsü, ta ashi.

"Vaccine atema lisopurtemi sen ka danga mintoktsü," ta Beijing nung osangbenertem den sensaksemba mapang Zheng-i ashi.

China-i, December tatemlen nüburtem atema mezüngbuba vaccine temelaba agütsü. Emergency-use program ka ajanga medical workers tem densema tashidak menatsü ana nung aliba nüburtem nem vaccine asem agütsü tenzükogo.

Food aser public transport sectors amala tongtiban loktitem densema linük ajunga nung December teyongtsü ka nungi vaccine agütsü tenzükogo.

Item vaccine tem ya angati agütsüdar, ta National Health Commission official Zeng Yixin-i ashi.

"Local sorkari kari nisung

kar dang taa agiba onoki ngutetogo, onoki tangsa dang inyakyim metongshitsü akhanger," ta Zeng-i ashiba den local sorkartemi tangbo free vaccination policy shidak benoka inyakdar.

China-i tang tashi nung Covid-19 vaccine doses million 9 agüjatokogo, ta Zeng-i ashi. Vaccine agütsür alibattem rongnung December tom nungi million 7 dak tema agütsüogo.

Kasa mapang nung China nung ketdangsürtemi Hebei province nung Shijiazhuang aser Xingtai yimti nung alirtem dang anogo tenet kidang nungi madoki alitsü atema tetuyuba agütsüogo. Taoba hopta tsüngda nisung 300 tema dak Covid-19 tashidak poteta, tang tashidak azüoktsü merangba mapang iba tetuyuba agütsüogo.

Iba yimti ana nung lokti adenshitsü atema tenokdangba agütsüogo.

Hebei nung taoba ghonda 24 tsüngda nisung 14 tema dak tashidak potetba jangjaogo aser ajak senteper nisung 137 jungogo. Kasa mapang nung tashidak keta aliba temaitsü mesayur nisung 197 daka tashidak potetogo. China-i tashidak keta aliba temaitsü mesayurtem mezüngoker.

Iran Lenir-i US & UK nungi Vaccines bener arutsü nokdang

Tehran, Aenjeti/January 9 (Agencies): Iran lenir Ayatollah Ali Khamenei-i, TV ajanga linük den jembiba mapang US aser UK nungi coronavirus vaccines bener arutsü tenokdangba agütsüba sangdongogo aser ashiba agi, iba linük ana dak temulung alemtsü kecha mali.

"Ni sorkar ketdangsürtem dangbo shiadokogo aser tang nüburtem nem metetdaksür. American aser British vaccine tem bener arutsü memelatsü," ta Khamenei-i ashi.

"Linük nung American aser British vaccines amshitsü memelatsü. US aser Britain dak temulung alemtsü mali," ta leniri ashiba Xinhua news agency sangdong ka ajanga metetdaksü.

Lenirisa, Iran nung yanglua aliba vaccine atema tenüngsang agütsüogo, koba nisung dak tendangdar. Pai ashiba agi, iba maparen ya linük atema nemadangtsü maparen ka lir aser iba ajanga

tarutsü nung linük nung tanga vaccine project tem renloka aotsü atema timla agütsür, ta ashi.

Khamenei-i nüburtem den jembiba sülen Iranian Red Crescent Society-i, American Pfizer Covid-19 vaccines bener arutsü aliba thiogo, ta metetdaksü.

"Iranian Red Crescent Society-i Pfizer Inc-i yangluba coronavirus vaccine dose 150,000 US nungi bener arutsü aliba thitsüogo," ta IRCS otongdar Mohammad Hassan Qosian Moqaddam-i state meyong IRNA news agency dang Hokolbar aonung ashi.

"Nüngdak dang süra teka amteper inyaktsü onok renema lir; Iran Ministry of Health, Treatment and Medical Education-i anüdoklen aliba linüktem nungi vaccine bener arutsü atema mepeshira onoki teyari agütsütsü," ta Moqaddam-i shisem.

2021 MG Hector Facelift India nung sayaogo

New Delhi, Aenjeti/January 09, 2021 (Agencies): MG Motor India-i 2021 Hector Facelift sayaogo. Iba gari sen lakh 12.89 (ex-showroom) nungi tenzüka angutsü. Hector nung first-in-segment feature balala, dual-tone exterior aser interior, 7-seater variant option tasen den külemi taoba variant ama 5 aser 6-seater option nung angutsü.

7-seater version ya Hector Plus brand kübok sayar aser iba version sen lakh 13.34 lakh (Ex-showroom) nungi tenzüka angutsü. 7-seater gari ya Style, Super, Smart aser 'Select' trim level nung angutsü.

2021 MG Hector nung Thermopressed front chrome grille, Champagne aser Black Dual-Tone themed interior, 18-inch Dual-Tone Alloys, i-SMART tajungba den industry-first Hinglish voice commands aser tanga feature balala angutsü.

MG Hector tasenba nung feature tasen talisa tejaklen ventilated seat, wireless charging aser auto-dimming interior rear-view mirror angutsü. Hector Plus 6-seater den Captain Seats, koba sen lakh 15.99 nungi tenzüka angutsü, iba variant nunga Front Ventilated seats, wireless charging aser Auto-Dimming IRVM inoksemtüsügo.

Iba den külemi MG Hector 2021 nung + Connected car feature 60 dak tema densema feature tasen talisa i-SMART app on Apple watch, Gaana app nung ken atema voice search, Wi-Fi connectivity, Weather forecast - Accuweather aser tanga aika angutsü.

Taoba model ama, Hector tasenba nung Electronic Stability Program, Traction Control, Hill Hold Control, Rear Wiper & Washer aser Rear Defogger densema safety aser security feature tem standard ama angutsü. Iba den külemi, gari engine ya taoba ama petrol aser diesel unit alitsü.

Maneni, MG-isa MG Shield den 5-year/Unlimited KMs warranty, 5-year Roadside Assistance aser periodic service pungo atema "Free Labour Charges" agütsütsü terenemba lir.

Redmi Note 9T aser Redmi 9T sayaogo

New Delhi, Aenjeti/January 09, 2021 (Agencies): Xiaomi-i alima ajungalen Redmi-series nung smartphone tasen ana - Redmi Note 9T aser Redmi 9T sayaba sangdongogo. Smartphone tasen ana ya China brand - Xiaomi indang mid-range phone tem ama ayoktsü.

Redmi Note 9T ya Redmi Note 9 5G, koba China nung yokdar, iba den tatongtep smartphone ka ama lir, saka iba version tera agi tajungba lir. Kasa mapang Redmi 9T ya Redmi Note 9 4G indang rebranded version ama angutsü, koba taoba ita (December 2020) India nung Redmi 9 Power ama sayaba ajaki jangjaa lir.

IoT wadang atsülangtsütsü nükjidong nung, Redmi smartphone den külemi, Xiaomi-isa Mi Smart Clock aser Mi 360 Secutiy Camera 2K Pro sayaogo.

Europe nung, Redmi Note 9T - 4GB RAM + 64GB storage variant jenjang EUR 229 (sen 20,500) aser 4GB RAM + 128GB storage EUR 269 (sen 24,100) nungi tenzüka angutsü.

Onoki teti meima aliba tsürapur asür **R. NOKDEN LEMTUR**

(Mopungchuket) shiranga aliba anogo nungi tasüba anogo tashi nung kija, lokti, Arogo, yimden kwinakati nübu, rongsen, sarasadem aser shisatsü agi onok den yaritepogo nenok ajak dang kanga pelar. Nenok ajak dangi tsüngtong arua tepela melemsateptet nung iba osang ajanga lemsateper. Nenok temeim mapa tajung onoki kodanga mamatsü aser ozüi kecha agütsütsü mali asünung tulusang Tsüngremi nenok jenti agi meyipa moajang ta ozü tamang sarasadem. Ajak dang kanga pelar.

- Temeim Chirnur, Semchir aser Adinutem



UNITY VILLAGE AO BAPTIST AROGO

Golden Jubilee Sentep Sentong

Anogo: 16th & 17th January 2021



Omen : "Teintet Nüji"

O Jembirtem:

1. **Rev. Dr. Mar Atsongchanger**, Executive Secretary, ABAM, Impur
2. **Mr. L. Panger Jamir**, Pastor UVABA

Menungrar



ASÜR SENLINOKCHA CHANGKIRI
(3rd Death Anniversary)

Ne takümü tanüngba, tongbang aser memelenshitetsüba tia ajak aremzüka ka liasü.

Onoki na bilemer, nüktzü aser teyongyaba agi, anogo ka nungi ka ta onok lia aodang. Onoki ne tepela jakten aser na aliba akhüm menunrar, Onoki anepdang shia nai tanemi ken atenba to menunrar,

Onoki nai nikongdang otsü ashibatem aser asaya menüba to menunrar. Onoki ne jaklaliro ajak menungraba ama, Onoki na tepela aser temeim agi bilemer Kechiyong na tang Tsüngrem den lir ta onoki metet

Teti tatem maka pelatettsüsa Aji onok tepela tagizüktetba lir Tanaben asenok majurutep tashi

"Shia aruba aser taküm ni lir. Shibai kü dak amangdir, pa süaka taküm alitsü." Yohan 11:25

- **Loving Wife, children, in-laws, grandchildren, great-grandchildren.**

MULUNGSÜ-YIMYIM



LATE OBGANGLEMLA JAMIR

29th August 1920 - 19th December 2020

Nisung kati iba lima toktsüdang mamangertemi tatembang ama bilema tejashi nüktzü ayimer, saka Khrista nung tamang katetba tamangertemi Teyangluri Pei meyong Pa dangi meyipa bener aoba anogo nung nüktzü aidoker tepela ken atener. Yamaji "Ojala" asen dak nungi pilaa Kibur dangi aoba anogo nung onok dang meimer shirnoki onok nüktzü aidoktsür temulung sünepja mangyim jashi mapang tepela agi melentsüba den nübo, mapang, rongsen kechisarena ajunga agi yaritepogo, nenok ajak dang pelar ta iba yimyim ajanga sangdonger.

Tsüngremi nenok kija kibong ajak ano nungdakbapur yaritettsüsa arishi anema aliba temoatsü agi moajang ta ozü tamang sarasadem.

- **Temeim Chirnur, Adianu, Kidangkimgang**

Romero aser Rojo nati Man United toktsütsü akok: Solskjaer



Ole Gunnar Solskjaer (File photo)

Aenjeti/January 09, 2021 (Agencies): Manchester United manager Ole Gunnar Solskjaer-i ashiba agi, tan January transfer window mapang goalkeeper Sergio Romero aser defender Marcos Rojo nati club toktsütsü akok.

Solskjaer-i ashiba agi, Argentine nung asayar ana - Sergio aser Marcos, shibai tan season asaya ka nung danga shilem magii, iba season tembanger sülen tena indang contract matsülangtsütsü.

"Club tanga nung tena adentsü asoshi onoki maparen inyakdar," ta Honibarnü Watford aser United na FA Cup tasembuba round masayadang osangbener dang Solskjaer-i ashi.

"Marcos ya Argentina nung lir aser club toktsü aotsü asoshi pa nem mapang agütsüogo. Sergio-a par adianu den ajuruteptsü asoshi kidangi ao saka pa tanaben arua lir. Tenaprongla football asayar takotet lir aser tenati meranga inyakdar," ta pai ashi.

Solskjaer-i ashiba agi, Uruguay nung winger Facundo Pellistri, shiba mezüing team squad den tesüiba ishika tejakdang nungi training agia liasü, pa dak COVID-19 tashidak tejangja putetogo aser Watford den asayadang pai United senior team nung shilem magitetsü.

Striker Odion Ighalo, shiba tan ita tatemlen pa indang contract tembangdang United toktsütsü, iba asaya nung pai taoba club atema shilem agitsü akok.

"Watford aser United tsüingda asaya ya Odion atema alakteta asaya tongtibatang ka asütsü aser pai squad den külemi asayatsü terenemba lir. Pai kanga junga training agiogo," ta Solskjaer-i ashi.

"Tan season, pai asaya aika nung shilem agitsü maongka mangu saka pai tezü metangi asayar takotet ka ama aser ajemalu jakla sayuogo" ta Solskjaer-i shisem.

Taruba Mongolbarnu, Burnley nung Manchester United-i asaya kokra, Premier League table nung parnoki temaba jenjang tongtetsü akok, saka Solskjaer-i FA Cup nung squad nungi asayar memelentsü asoshi metetdaksüogo.

"Onoki takok angutsü temulungtetba tulu yur iba asayamung nung shilem agir. Squad nung asayar kari junga shilem magiba asadantetogo aser asayar kar melentsü saka ni temulung adokba team ka shima asayadaksütsü," ta Solskjaer-i ashi.

England nung tongtibatang saisapong maneni asayatsü

London, Aenjeti/January 09, 2021 (Agencies): England nung Covid-19 wara tapu tasenba aser tesashiba adoka nübur tsüingda iba tashidak kara menatepa aoba ajanga hopta tetenzüklen, Ato Kilonser Boris Johnson-i 'national Covid-19 lockdown' tasen alitsü sangdong yongjia, linük nung tongtibatang saisapongtem maneni asayatsü.

Tang, United Kingdom nung nisung million 2.96 dak tema Covid-19 tashidak putetba aser iba tesashi wara ajanga nisung 79,800 dak tema asüba osang jangjaogo. Iba den külemi Honibarnü (08.01.2021) linük nung nisung 60,000 dak tema coronavirus tashidak tasen putetba osang angazükogo.

Iba tensa asadanga, England-i kidanger linük Scotland inyakim nung anidaka, nübur ajak pei pei kidang kazütsü den ang lockdown özüng takhangba amenok, saka tongtibatang saisapongtem maneni asayatsü.

Gym, tennis court aser golf course densema moapu nung

ayongba saisapongtem shibangtsü; kasa mapang moapu nung team saisapongtem memelatsü, saka Premier League soccer densema tongtibatang saisapongtem maneni asayatsü.

Football saisapong tsütsü, Mongolbarnü aser Bodhbarnü League Cup semi-final asayatsü renema lir, iba sülen FA Cup round tasembuba asayatsü, koba Hokolbarnü nungi tenzütsü.

Newcastle United, Manchester City aser Fulham nung züngsem dak COVID-19 tashidak putetba ajanga asaya pezü tashi anogo atsülangtsüba sülen, Premier League fixture nunga tesükdaksü adoka liasü.

Newcastle aser City nung züngsem kar dak tashidak tasen putetba ajanga asayartem tanaben training centre-i meyipa marudang iba tesem jung junga mozützü agi merütsü atema Club temi training centre tem shibangtsüsa aküm.

Taoba ita (December 2020) hopta ka tsüingda Premier

League nung züngsem 18 dak coronavirus tashidak tejangja putet, koba season (2020-21) nung tashidak puteter timtiba liasü aser iba season tenzüker round 17 tashi tendangba nungi English top flight nung züngsem 131 dak iba tashidak positive tendangtet.

Soccer indang tier tekübokbatem nunga Covid-19 tensa tamajungba lir, kechiyong English Football League (EFL) club nung asayar aser staff tem mapang shia iba wara atema metendanger aser iba League nung iba tashidak tali puteta aoba ajanga tan season nung asaya 50 dak tema thitsütsüsa kümadok.

Kasa mapang, iba wara ajanga Premiership rugby nunga asaya ishika athi yongjia, iba asayamung maneni asayatsü terenemba lir.

Ajisüaka, Premier League nung thitsü/anogo atsülangtsü aliba asayatem tanaben asaya yongjia, Premiership rugby nung thitsü aliba asayatem tanaben masayatsü.

January 14 nü CWA-i senden ka ayongzüktsü

Kohima, Aenjeti/January 09, 2021 (TYO): Naga Wrestling wadang ajungkettsütsü nükjidong nung, January 14, 2021 anepdang 10:30 ako meta Mt. Sinai Higher Secondary School (MSHSS), Ministers' Hill, Kohima indang Auditorium Hall nung Chakhesang Wrestling Association (CWA)-i shisadokten senden ka ayongzüktsü, ta sangdong ka ajanga CWA, General Secretary, Kuzhovesa Soho-i metetdaksü.

Kuzhovesa Soho-i, CWA jenjang nung inyakim tasentem tenzüksütsü, wrestler tasentem nem sabang agüja asayar takotet ka ka kümdaksütsü; iba den külemi tarutsü nung national aser international jenjang tongtetdaksütsü nükjidong yur iba senden ayongzükter.

Minister for Planning & Coordination, Land Revenue and Parliamentary Affairs, Govt of Nagaland, Neiba Kronu-i iba senden nung aruagi adentsü aser sponsor asütsü asoshi mulungsoa agizük, ta pai ashi.

Iba senden atema, CWA-i Chakhesang Legislator ajak, RS MP, Chakhesang Church Councils/Associations nungi teshimtet nübu ka ka, taoba mapang CWA President, Chakhesang Community nungi Nagaland Wrestling Association (NWA) nung tang teinyakdak aliba ketdangsürtem, CWA ketdangsürtem, CWA den sendaktepa aliba Association (viz; CAWA, CRWA, KKTWA, SWA, PAWA) nungi teshimtet nübu anana, Chakhesang indang tongtibatang tentet (viz; CPO, CSU, CYF, CMA, CHK,

PDSA) nungi teshimtet nübu anana aser temulunger ajak jaoker; aser iba senden nung ajak medema aruagi adentsü imlar.

Iba senden nung CWA President Vekhozo ajanga power presentation agütsütsü, Neiba Kronu, Minister for Planning & Coordination, Land Revenue and Parliamentary Affairs, Govt of Nagaland, MLA Kuzholuzo Nienu aser Dr. Chotisuh Sazo den tanga tejaokertemi o jembitsü.

Senden nung pangzüng renembatem CWA General Secretary Kuzhovesa Soho-i agizüktsü. CWA Advisor, K. Puro-i tepela anküp o jembitsü aser telok chiyongba mapang agitsü. Iba sentong takok ngua agitsü asoshi ajaki sarasadema atadi, ta kasa sangdong ajanga metetdaksü.

February 03 nü BFI pur election agitsü

New Delhi, Aenjeti/January 09, 2021 (Agencies): Boxing Federation of India (BFI)-i anogo atsülangtsü aliba election February 03, 2021 nü agitsü terenemba lir. BFI pur election ya taoba küm September ita agitsü renem saka COVID-19 wara süshia maoba ajanga iba maparen atema anogo atsülangja aru.

Iba election thinena dang aruba ajanga maparen dak sendakba nung telemtetba ka agütsütsü asoshi Uttar Pradesh Amateur Boxing Association-i Delhi High Court dang achayangtsü asoshi mepishia liasü.

Taoba ita (December 2020) iba petition agizükba sülen court-i BFI dang parnok indang election schedule agütsütsü asüingdang. Hokolbarnü court nung jembitepba sülen, February 03, 2021 nü BFI election agitsü atema anogo lemtet.

"... schedule nung renemba ama February 3, 2021 nü election agitsü. BFI ajanga agütsüba schedule ya telok ajaki agizükogo," ta federation sangdong ka ajanga metetdaksü.

Boxing Federation of India pur election ya Gurugram kübok federation headquarters nung AGM nung agitsü renem.

Iba election nung president indang menden atema tang teinyakdak aliba President Ajay Singh ya taoba mapang Mumbai Cricket Association president aser BJP lennir Ashish Shelar-i tokteptsü sangdongogo. BFI electoral college nung Shelar aniokba sülen, December 02, 2020 nü pai nomination file asü.

Arishi küm 48 tain Shelar ya taoba mapang Maharashtra indang sports minister lir. Iba den külemi Mumbai District Football Association indang chairman-a inyakogo, koba iba tentet kübok club 359 lir.

Tang, Shelar ya Bandra West constituency nungi MLA ka lir.

International Boxing Association (AIBA) kübok election agiba sülen, 2016 küm nungi Ajay Singh-i BFI nung president inyak arudar.

"Election agitsü asoshi court ajanga joko anogo matsülangtsü lemtetba ni pelashishia agizükter," ta court ajanga osang agütsüba sülen Shelar-i metetdaksü.

South Africa squad nung Daryn aser Ottniel na aniok



Cape Town, Aenjeti/January 09, 2021 (Agencies): January ita tatemlen Test match series ana atema, South Africa cricket squad nung asayar 21 tenüing sangdongogo. Küm 14 nung South Africa team Pakistan-i oa asayatsü renemba ya tang mezüing alitsü.

Iba tour atema, South Africa-i squad nung asayar tasen ana - Daryn Dupavillon aser Ottniel Baartman na anisemogo.

January 26, 2021 nü nungi telok ana tsüingda Test-series ya tenzüksü aser iba series Karachi o Rawalpindi nung asayatsü ternemba lir. Iba tour mapang, South Africa team nungi fast bowler Kagiso Rabada aser all-rounder Dwaine Pretorius na den külemi spinner Tabraiz Shamsi aser George Linde nungeri tanaben team nung asayaba angutsü.

Quinton De Kock, shibai Sri Lanka den asayaba mapang South Africa Test team atema captain inyak, tanaben pa

lenisüba kübok Pakistan Tour asayatsü.

Sri Lanka den Test asayadang, South Africa nungi Aiden Markram aser Dean Elgar nati mezüing innings nung junga asayaogo.

South Africa team commercial flight ka nung Pakistan-i aotsü aser training metenzükdang Karachi nung quarantine asütsü aser January 26 nü asayamung metenzükdang series atema renemshitsü mechi intra-squad asayatem ayongzüktsü.

South Africa indang asayar 21 Test squad nung Quinton De Kock (c), Temba Bavuma, Aiden Markram, Faf Du Plessis, Dean Elgar, Kagiso Rabada, Dwaine Pretorius, Keshav Maharaj, Lungi Ngidi, Rassie Van der Dussen, Anrich Nortje, Wiaan Mulder, Lutho Sipamla, Hendricks, Kyle Verreynne, Sarel Erwee, Alvaro Petersen, Tabraiz Shamsi, George Linde, Daryn Dupavillon aser Sarah Baartman dena lir.

BILEMDANGANG

"Tangar tashimait nung masü, onük nungji rangloker jembiang."